

Lieutenant Texeira di Formacion Social:

Nos meta ta pa yuda mas tanto hoben haya nan diploma y consecuentemente haya un trabao



ORANJESTAD(AAN): Di-aluna mainta 24 hoben a presenta na Marinierskazerne na Savaneta pa duna inicio na e entrenamiento militar cu nan ta participa aden como parti di e programa di Formacion Social.

Manera ta conoci, e proyecto introduci pa Prome Minister Mike Eman ta un cooperacion entre Ministerio di Asuntonan General di Aruba y Ministerio di Defensa di Hulanda y ta conta cu sosten di departamento di Enseñansa pa Empleo, Marinierskazerne na Savaneta, entre otro. E obhetivo di Formacion Social of Sociaal Vormingstraject (SVT) ta pa duna hobenan cu no a caba school y sin trabao un di dos oportunidad logra miho futuro pa nan mes y bira un ciudadano productivo pa nos comunidad.

Den e trayecto di 12 luna, e hobennan ta ricibi entrenamiento militar, educacion pa ofishi y ta pasa den un periodo di stage. Frecuentemente e hobennan ta keda traha caminda a pasa su periodo di stage. Durante e di dos fase di e programa, despues di a inscribi y pasa e seleccion, ta cuminsa cu un estadia na e base militar na Savaneta. Pa un periodo, nan ta desconecta di nan ambiente usual incluyendo famia y amigonan. Gradualmente nan ta worde permiti pa bay cas pa mas y mas tempo. Mientras tanto nan ta ricibi un entrenamiento militar cu ta basa riba condicion fisico y primordialmente, disciplina. Lieutenant Jose Texeira, encarga cu e grupo di Formacion Social a splica cu ta tuma djis algun

dia di introduccion prome cu ta bay directamente den e entrenamiento di sobrevivencia. 'Awe e hobennan a presenta na MariniersKazerne pa prome biaha. E opleiding ta start, nan ta haya tur nan material, uniform, etc. Ta bay cuminsa siña e sistema cu ta draai den kazerne. Den e siman cu ta bin, ta cuminsa dreña den mondi.' E fase aki ta dura cuater luna. Manera a menciona, esaki ta e di seis grupo cu ta inicia e trayecto di Formacion Social. Como cu ta un proyecto nobo y unico, pesey 'a adapta cierto cosnan pa mehora e programa lo miho posibel y logra pa mas tanto hoben slaag tanto pa e parti militar como esun di enseñanza pa empleo,' Lieutenant Texeira a splica. E determinacion di e hoben ta esencial, pero ta yuda hopi tambe e sosten di famia pa asina keda cu e bista riba e meta. Di nan parti, oficina di Formacion Social ta conta cu conseheronan riba diferente tereno, incluyendo spiritual pa yuda e hobennan den momentonan di duda of debilidad. Lieutenant Texeira a bisa cu 'Na final di un aña nos meta ta pa yuda mas tanto hoben haya nan diploma y consecuentemente haya un trabao.'

